



Mwabudu Mwumbaji

Mcheni Mungu, na kumtukuza, kwa maana saa ya hukumu yake imekuja. Msujudieni yeye aliyezifanya mbingu na nchi na bahari na chemchemi za maji.—Ufunuo 14:7.

Wajibu wa kumwabudu Mungu umejengwa katika ukweli kwamba Yeye ndiye Muumba na kwamba viumbe wengine wote wanawajibika Kwake kwa kuwepo kwao. Na popote katika Biblia ambapo madai Yake ya kuheshimiwa na kuabudiwa juu ya miungu ya wapagani yanawasilishwa, kuna ushahidi wa nguvu Zake za uumbaji. “Maana miungu yote ya watu si kitu, lakini Bwana ndiye aliyezifanya mbingu” (Zaburi 96:5). “Mtanifananisha na nani, basi, nipate kuwa sawa naye? Asema yeye aliye Mtakatifu. Inueni macho yenu juu, mkaone; ni nani aliyeziumba hizi; aletaye nje jeshi lao kwa hesabu; aziita zote kwa majina; kwa ukuu wa uweza wake, na kwa kuwa yeye ni hodari kwa nguvu zake; hapana moja isiyokuwapo mahali pake” (Isaya 40:25-26; Isaya 45:18).

Mtunga zaburi anasema: “Jueni kwamba Bwana ndiye Mungu; Ndiye aliyetuumba na sisi tu watu wake.” “Njoni, tuabudu, tusujudu, tupige magoti mbele za Bwana aliyetuumba” (Zaburi 100:3; 95:6). Na viumbe watakatifu wanaomwabudu Mungu mbinguni wanatamka kama sababu ya kumwabudu Yeye: “Umestahili wewe, Bwana wetu na Mungu wetu, kuupokea utukufu na heshima na uweza; kwa kuwa wewe ndiwe uliyeviumba vitu vyote” (Ufunuo 4:11).

Kwenye Ufunuo 14, watu wanaitwa kumwabudu Muumba; na unabii unaleta kundi ambalo linazishika amri za Mungu kama matokeo ya ujumbe wenye sehemu tatu. Moja ya amri hizo inaelekeza moja kwa moja kwa Mungu kama Mwumbaji. Agizo la amri ya nne linasema: “Lakini siku ya saba ni Sabato ya Bwana, Mungu wako, ... Maana, kwa siku sita Bwana alifanya mbingu, na nchi, na bahari, na vyote vilivyomo, akastarehe siku ya saba; kwa hiyo Bwana akaibarikia siku ya Sabato akaitakasa” (Kutoka 20:10,11). Kuhusu Sabato, Bwana anaendelea kusema, kwamba ni “ishara...mpate kujua ya kuwa mimi ndimi Bwana, Mungu wenu” (Ezekieli 20:20). Sababu inayotolewa ni hii: “Kwa siku sita Bwana alifanya mbingu na nchi, akastarehe kwa siku ya saba na kupumzika” (Kutoka 31:17)....

Kadiri ukweli kwamba Yeye ndiye Muumba wetu unavyoendelea kuwa sababu ya sisi kumwabudu, ndivyo Sabato itakavyoendelea kuwa ishara na kumbukumbu yake. Kama Sabato ingekuwa inashikwa ulimwenguni kote, mawazo na hisia za mwanadamu zingeelekezwa kwa Muumba kama lengo la heshima na ibada, na kusingekuwa na mwabudu sanamu, mkanamungu au asiyeamini. Kutunza Sabato ni ishara ya uaminifu kwa Mungu wa kweli, “Yeye aliyeziumba mbingu na nchi na bahari na chemchemi za maji.” Hivyo basi, ujumbe unaowaamuru watu kumwabudu Mungu na kushika amri Zake utawaita waishike amri ya nne (The Great Controversy, 436-438).